



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 7

Tang atemabo assembly elections  
tongtibangba: Mallikarjun Kharge

Nepal nung menoknok tesashi  
ka anak: nisung 143 asu



VOL. XXI NO. 28 (ADOK 28) DIMAPUR AMUNGNÜ (SUNDAY) YIMPOKSÜI (NOVEMBER) 05, 2023 ₹ 5.00

## Kohima nung Multi Level Car Parking ana lapokogo; Gari 305 anentettsü

**Kohima, November 4, 2023 (TYO):** Kohima kübok Old Medical Directorate aser New NST nung Multi Level Car Parking (MLCP) ana lapokogo.

Honibarnep Nagaland Governor La. Ganesan-i PR Hill MLCP lapoktsü aser tanü anügang Union Minister for Housing & Urban Affairs and Petroleum & Natural Gas, Hardeep Singh Puri-i New NST MLCP lapoktsü.

Sentong anaprong nung Chief Minister Neiphiu Rio, cabinet minister tem, advisor tem aser MLA tem aden.

Iba mapatong ana ya Kohima Smart City project kübok inyak. MLCP PR Hill yangluba nung Rs. 31.22 crore aser MLCP New NST nung Rs 28.78 crore endok.

“State yimtiba Kohima nung MLCP ya mapang talangka nungi nüngdaka aliba mapa ka lir. Iba ajanga Kohima nung modern parking smart solutions tenzütsü aser traffice inyakyim ajema akümsü” ta Kohima Smart City Development Ltd. (KSCDL) Chief Executive Officer (CEO) K. Theunuo-i ashi.

“Iba ajanga tawa peria malidak gari anentsü tesem angutsü. MLCP ajanga Kohima nung alirtem ajangzütsü aser mapa inyaksü maongka aika anguba den sorkar senpongi sen aittsü” ta pai ashi.



November 4, 2023 anepdang Governor La. Ganesan, Chief Minister Neiphiu Rio aser tangartem PR Hill, Kohima nung MCLP lapokba sülen agiba noksa angur.

Kasa mapang iba ajanga yimdong nung gari anendenba azüoktsü, lendong ajema akümsü aser lenmang nung tetsüing agi sadema senzütsü, ta Theunuo-isa shisem.

Old Medical Directorate, Kohima nung Multi Level Car Parking ya mezüingbo March 2009 nung Ministry of Urban Development kübok JNNURM Scheme nung Rs 13.86 crore lezmzütsü. Ajisüaka senotsü maliba ajanga iba mapatong ya August 14, 2015 nung de-sanctioned asü aser kum 2 senzüka yutsü. Kohima Smart City Development Ltd tenzüka sülen September 27, 2018 nü iba mapatong Kohima Smart City ket nung agütsü, ta pai metetdaksü.

“Special Purpose Vehicle (SPV) ketdangsuba sülen KSDL-i iba mapatong agizük aser Rs 31.22 crore lezmzütsü. Iba contract ya M/s Guolhoulie & Sons nem agütsü aser October 10, 2018 nü kum ana tsüingda yanglutsü mapang atakzütsü. Ajisüaka Covid-19 wara ajanga kum ana jungnüa mapa meinyaktet aser taoba ita mapa renem” ta KSCDL CEO-isa ashi.

PR Hill MLCP nung dokantem atema takdang 62 lir aser gari 180 shi anentettsü, ta paisa shisem.

New NST nung MCLP ya March 2009 nung Ministry of Urban Development-i JNNURM scheme kübok Rs 10.35 lezmzütsü. Ajisüaka senotsü

maliba ajanga 2015 kum de-sanctioned asü aser 2018 kum SCM kübok KSCDL ket nung agütsü.

KSCDL-i iba mapatong agizük aser Rs 28.78 crore lezmzütsü. Iba contract mapa ya M/s Viu Angami & Sons nem agütsü aser October 10, 2018 nungi tenzüka saka Covid-19 wara ajanga takum July ita nung ang renem.

MLCP, NST Bus Station nung bus bays 6 lir aser gari 125 den two wheelers 50 tem anentettsü, ta Theunuo-isa ashi.

Mapatong anaprong nung Public Toilets (gents & ladies) lir aser NST MLCP nungbo PwDs atema washroom tajung lir ta paisa shisem.

Entry/Exit ajak nung Automated Boom Barriers enoka lir aser surveillance & security atema CCTVs lir. Maneni ki ajunga nung Fire Fighting and Emergency Response System enoka lir aser gari anendak ajak nung epoxy car deck flooring lir, ta paisa metetdaksü.

Contract Agreement nung lateta aliba MLCP anaprong indang operational aser Management ajak contractor anati reprangtsü, ta KSCDL CEO-isa ashi.

“Maneni Kohima Smart City ajanga MLCPS ana- ka City Center nung aser ka Local Ground nung yanglutsü. MLCPS shia gari 120 anentettsü aser item ajanga Kohima yimti nung gari 545 anentsü tawa angutsü” ta Theunuo-isa ashi.

MLCP PR Hill nung agiba sentong nung Urban Development & Municipal Affairs Advisor Zhaleo Rio-i tesentepertem pelaa agizük aser Urban Development & Municipal Affairs Commissioner and Secretary Kenilo Apon-i anküp tepela o jembi.

MLCP New NST nung Angami Baptist Church Council Executive Director Rev. Dr. Rachülie Vihienuo-i sarasadem aser Chief Secretary J. Alam-i anküp tepela o jembi.

## Kma & Dmr police-i shishilembar ka kumzük

**Dimapur, November 4, 2023 (TYO):** October 26, 2023 nü mejangjatetba nisung kari Dimapur nung Anil ta ser nisung ka pur aoba sülen November 2 nü Kohima aser Dimapur Police temi pa kumzükogo.

Anil pur aoba atema October 29, 2023 nü South Police Station nung FIR ka benoka liasü. Iba dak sendakba nung bushisüingdanga arudang pa October 26 nü Dimapur-i aoba

osang angazük, ta PRO, Kohima Police-i ashi.

Anil'er kinunger kati sen apuba sülen jena aoba ken o angateteptsü atema Naga yimtenren telok kati pa Dimapur-i jaok ta Kohima Police-isa metetdaksü.

Iba sülen November 2 nü South PS, Kohima aser Dimapur Police külem telok kati pa Dimapur nung kumzükogo aser maneni bushisüingdang südar, ta parnokisa ashi.

## Zhaleo Rio-i Station Road, Dimapur renloktsü merangba pelaa agizüker

**Dimapur, November 4, 2023 (TYO):** Urban Development & Municipal Affairs Advisor Zhaleo Rio-i Dimapur nung kanga dang nüngdaka aliba terenlok mapa tenzüka atema tenüngsang agütsür ta Building/Land Owners' of Station Road, Dimapur-i metetdaksü.

“Advisor Zhaleo-i Dimapur sema senzüba aser talisa New Fly Over Bridge, Hazi Park,

Hongkong Market, Station Road Dimapur nung ozüingi memelaba Vendors/Hawkers ajanga ki sübanger aliba tesemtem semdangba atema kanga pelar. Item ozüing alema inyakba mapa ajanga gari senzütsü aser anentsüba dang masü saka tetsüing agi senzütem timtemer” ta BLOSR, Dimapur-i sangdong ka nung ashi.

Advisor Zhaleo-i iba lenmang

nung Vendors/Hawkers ajanga yangluba ki ajak bentoktsü tetuyuba agütsüba atema tenüngsang agütsür. Sorkari iba tesem nung terenlok mapa kechi inyakdir onoki amalitepa yariteptsü, ta parnoki ashi.

Advisor Zhaleo-i public ajangzütsü aser public-i ajuruba khurettem asoshi bilema inyaksüba atema kanga pelar, ta BLOSR-isa sangdong nung shia lir.

## ACVOA ayongzüka Chakka Bandh anogo ananütashi district 6 nung liogo

**Mokokchung, November/ Yimpoktsü 04 (TYO):** Mokokchung, Zünheboto, Tuensang, Longleng, Phek aser Peren ta district 6 nung All Commercial Vehicle Owners Association (ACVOA) teloki takum Nagaland Legislative Assembly election nung official duty atema gari amshiba sen magütsü aliba asoshi mepelaba sayua Chakka Bandh ayongzüka November 3 aser 4 nü anogo ananütashi district 6 prongla nung commercial gari kata mesenzüi anogo tembangdaksüogogo.

Taoba ita October 9 nungi ACVOA ajanga commercial gari kata mesenzüi Chakka Bandh akatsü sentong renemer aliba

mapang October 8 nü Nagaland sorkari tagütsütsü sen ajakji October 31 tashi nung agütsütsü ta nangzüka ajanga iba bandh tihtemer ata, saka sorkari nangzüka ama meinyakba ajanga tang Chakka Bandh ya ayonga lir.

Tir Yimiyim-i iba Chakka Bandh indang tejangjaba nung metetnüa All Nagaland Taxi Association Mokokchung (ANTAM) Tir Wb. Tongpangba den jembidang iba Chakka Bandh dak sentakba nung jokola sorkar den aiben jembitsü madoker, parnoki nangzüka anga taoba ita Chakka Bandh tihtemer liogo saka ibaji parnoki meinyak, anungji onoki tangbo onok tebilemba matong tashi iba Chakka Bandh ya manentsü ta ashi.

ANTAM Tir-isa takum kum tetenzüklen onoki sorkar tashi anga sorkar nungita sorkar mapa inyakogo, saka ibaji parnoki mangateter, parnoki senji onok ket metongtsü tashi onoki iba bandh ya manentsü ta metetdaksü.

Tang Chakka Bandh akaba ajanga nüburtem aika tetsükdaksü ajurudar alitsü südi saka iba Chakka Bandh ya ayongtsüsa kumogo, anungji nüburtemi angatetdaksüner aser ano maneni nübur tsütsülen nungia sorkar den takokba lenmang bushia iba bandh atemaya jembidaksünerta ANTAM Tir Wb. Tongpangba-isa nüburtem den lemsatepba olen ka iba osang zülur den jembidangsa shisem.



PHED & Cooperation Minister Jacob Zhimomi-i New Delhi nung Union Minister of Cooperation and DoNER B L Verma den ajurutepdang agiba noksa angur. Iba mapang tenati Nagaland nung cooperative sector renloktsü, yimtsüngtem nung Cooperative movement tenzüksütsü, development clusters yanglutsü aser banking infrastructures amenoktsü indang onüktem lemsatep.

# DDU-GKY trainees tem Graduation sentong agiogo



Minister RD& SIRD, Metsubo Jamir, ketdangsürtem aser kaketshirtem graduation sentong nung tangokba noksa nung angur.

**Dimapur, Yimpoksuü/ November 4 (TYO):** Nagaland State Rural Livelihood Mission-i, November 4 nü Lack Deck, Nouné Resort, Seithekema-A Village, Chumoukedima nung Deen Dayal Upadhyaya Grameen Kaushalya Yojana kübok DDU-GKY atema combine graduation sentong ka ayongzüka katsüogo.

Iba sentong ya "Transforming rural youth into an economically independent and globally relevant work force" omen nung ajemdaker agia liasü.

Sentong nung alakteta jaoker ama o jembiba mapang Minister RD& SIRD, Metsubo Jamir-i, takok tajung anguba DDU-GKY trained candidate tem nem tenüngsang agütsü, shirnok job placement atema renema lir. Paisa, combine graduation sentong ajanga, lanurtem sorkar mapa dak dang merangloki aliba kuli agütsür ta ashi. Pai ashiba agi, lokti nung ajak nem kaketshisatsü aser training agitsü asoshi maongka agütsüba ajanga unemployment tajemba kümdaktsüba dang masü saka terenlok tali adokdaksür. Asenoki kodang

human capital terenlok asoshi inyakdir idangji asenoki linük tarutsü yimjiyimjung asoshi jenjang agir, ta pai ashi.

Minister-i, tanü kanga dang kara meleshia aoba lima ka nung, technology aser industry tasentem takhangba aser tetsükdaktsütem koktetyonga aotsü asoshi mapa inyakertem kanga junga renema toktsütsü kanga tongtibang lir ta ashi. Mapa manguba ajanga tanü nüburtem taküm nung kongshiba dang masü saka iba ajanga tarutsü terenlok daka kongshir, ibayongji iba ken o ya sorkar agency tem, shishilembaba balala, educational institution tem aser nüburtem longjemer bendentettsü nüngdaker, ta pai ashi.

Educational qualification dak alia tanga skill angazüka takok ngua graduate asütem nem tenüngsang agütsüba mapang pai, iba ya lokti nung zünger mapa mangu alir meyirejang aika asoshi tenük lapokba mapang ka asütsü ta ashi.

Sentong nungsa Joint Secretary, RD & Mission Director, NSRLM, Imtinenla-i okila jembiba mapang, iba program ajanga yimdak yimtsüng nung aliba lanur 6716

nem training agütsüogo, lanur 4050 nem linük kübok tesem balala nung mapang agütsüogo. Parnoki aazükba sen shilem 10 nungi 15 tashibo yimdak yimtsüng nung kibongtemi aier aser training agir aliba lanurtem UK, Italy, Germany aser Saudi Arabia, Oman, UAE, Bahrain aser Qatar amala Gulf linüktem nung oa mapa inyakdar, ta ashi. Laisa DDU- GKY version 2 yakta tenzüksü aser iba atema NSRLM-i course yanglutsü, koba tarutsü nung bendanglen oa inyaksü atema lenmang tajungba lapoktsütsü asoshi rangloker inyaksü, ta ashi.

Sentong nungsa Minister-i, trainees tem nem offer letters agütsü liasü. Graduation sentong nung Youth Pastor, Valley View Sumi Baptist Church, Y Vinika Shohe-i sarasadem, graduate asüba trainees tem rongnungi Pujie C Khamniumgan-i o jembi, Anchal Technovations Pvt. Ltd aser Rokono, PLS Auto Shell Industries Pvt. Ltd. nati tajungshi o jembi, tsürapur/ guardian tenüng nung NK Enock Najel aser Y. Toli Chishi nati jembi aser Chief Operating Officer (Skills), NSRLM, Menuoneituo Chadi-i tepela o jembiba liasü.

# State Task Force senden menogo



**Dimapur, Yimpoksuü/ November 4 (TYO):** Commissioner & Secretary H&FW V. Kezo-i ayongzüka Vector Borne and Other Communicable Diseases dak sendakba nung Vector Borne and Other Communicable Diseases senden ka November 3 nü Health & Family Welfare Department, Nagaland Civil Secretariat, Conference Hall nung menogo.

Senden nung Dengue tashidak nokdangtsü atema jenjang agibatem lepa repringshi aser iba den Nagaland nung iba tashidak kanga kara prokshia

aoba nokdangtsü atema jenjang agitsü asoshi sensaksema liasü. Iba senden nung DH&FW nungi ketdangsür tejentem aser allied department tem nungi lenirtemi shilem agia liasü.

Mon aser Dimapur nung dengue tashidak agi shiranger aika küma aoba indang jembiba mapang V. Kezo-i, ken o dak sendaka aliba department ajak dang taruba küm asoshi renemshia alitsü aser tali yakyaka inyaksü ajungshi. Paisa, Mon district nung awareness campaign ka agitsü kanga nüngdaka lir ta shia pai allied department ajak dang

parnok tebilembatem lemsateptsü ayongzüka liasü. Maneni pai, renemshia atatsü asoshi stakeholder department ajak longjemer sentong ka yanglutsü mepeshia liasü.

Senden nungsa taoba SPO, NVBDCP Dr. Neisakho Kere-i Dengue tashidak, district balala nung dengue tashidak indang jenjang, inyakyim balala benoka inyakbatem, dengue tashidak tali küma aoba nokdangtsü atema department aser agency temi shilem agitettsü alibatem, tashidak kodaser nokdangtsü, diagnosis aser treatment indang tatongi rasa ashi.

# Mhathung Yanthan-i PAC senden ayong

**Dimapur, Yimpoksuü/ November 4 (TYO):** MLA aser Public Accounts Committee mendenbuba Mhathung Yanthan-i, Departmental Representatives tem den Public Accounts Committee, Nagaland Legislative Assembly, Oral Evidence senden ka ayongzüko. Iba senden ya November 14 aser 15 nü 11:00 nungi tenzüka amentsü.

November 14 nü Finance Department (Treasuries & Accounts/Revenue/Taxation/ Nagaland State Lotteries/State Finances) aser November 15 Planning & Coordination, Municipal Affairs, Motor Vehicles, Rural Development,

PHED and Horticulture Department dak sendakba nung sensak asemtsü. Committee-i, Comptroller and Auditor General of India 2019-2020 Report dak sendakba nung sorkar department tem indang Audit para (s) oral evidence agitsü.

Anungji ken o dak sendaka aliba department tem nungi AHOD aser HOD ajak atakzüka aliba anogo senden nung arua shilem agitsü asoshi m e n d e n b u b a i s a metetdaktsüogo. Maneni Committee züngsemtem ajak shisema aliba anogo mapa shidak nung arua senden nung shilem agitsü asoshi mepeshia metetdaktsüogo.

# Hardeep Singh Puri-i Tuensang semdang



Minister of Petroleum and Nature Gas, Minister of Housing and Urban Affairs Hardeep S Puri-i DC Conference Hall Tuensang nung Beneficiary tem den sensaksema mapang tangokba noksa nung angur.

**Dimapur, Yimpoksuü/ November 4 (TYO):** Minister of Housing and Urban Affairs and Petroleum & Nature Gas Government of India, Hardeep Singh Puri-i November 4 nü Tuensang semdanga district nung Ujjwala Yojana beneficiary tem den sensaksema liasü.

Sentong nung o jembiba mapang Minister-i ashiba agi, Ato Kilonser Narendra Modi kübok North East aser talisa Nagaland renloka aoba ya aikati nguogo aser Tuensang nung Ujjwala Yojana scheme kübok beneficiary aika aliba ngua pa kanga pelar ta ashi.

Paisa, wara pokteter aliba mapang Centre nung tang aliba sorkari nüburtem nem scheme aika agütsüogo aser iba ajanga nüburtem libaliro jenjang ajungkettsüogo aser nüburtem aser talisa tetsürtem rongsenketzung jenjang

ajungkettsüogo, ta ashi. Minister-i, Tuensang jila nung Multi Shopping Mall ka aser Parking asoshi project benoka inyaksü nangzüka liasü.

Minister meina Minister Housing & Mechanical Engineering, Bashangmongba Chang, Advisor Youth Resource & Sports, Keoshu Yimchunger, MLA Imtichuba, MLA Benei M Lamthiu aser State BJP President, Benjamin Yepthomi aser tanga ketdangsürtem oa liasü.

Iba sentong ya DC Tuensang, Lithrongla Tongpi Rutsa lenisüba nung agi; lokti pela agizükba o Minister Housing & Mechanical Engineering, Bashangmongba Chang-i jembi aser Ujjwala Yojana dak sendakba nung IOC Ltd aser DAY-NULM dak sendakba nung DUDA-i power point presentation agütsü liasü.

# TOT sentong nung Nagaland-i shilem agi



**Dimapur, Yimpoksuü/ November 4 (TYO):** EAC Longchem, Mokokchung district, N Orenthung Kikon NCS-i, National Institute of Disaster Management, New Delhi nung Engaging Risk Youth & Adolescents in Disaster Management and Climate Change Adaptation dak sendakba nung Training of

Trainers sentong nung shilem agiogo. Linük kübok tesem balala nungi iba sentong nung shilem agir 64 rongnungi Nagaland nungi pa kija liasü. Paisa, Nagaland sorkar indang World Bank-i senotsü teyari agütsüba NEPTAR PIG program indang presentation tatsüka agütsü liasü.



November 04, 2023 nü New Delhi nung BJYMs national executive senden tetenzük anogo nung Union Education Minister Dharmendra Pradhan, BJYM Tir Tejasvi Surya aser party lenirtemi Pt. Deen Dayal Upadhyaya nem akhüm agütsüba sülen tangokba noksa nung angur.

### Sorkari ano küm pongu angati ration agütsütsü: PM Modi

**Bhopal, Yimpoksüi/ November 04 (Agencies):** November ita nung assembly election agitsü aliba state ana-Madhya Pradesh aser Chhattisgarh na nungi Honibarnü Ato kilonser, Narendra Modi-i kanga tongtimbang sangdong ka metetdaksüogo. Honibarnü Chhattisgarh state kübok Durg aser Madhya Pradesh kübok Ratlam nung election nüboyim sentongtem nung jembidang Ato kilonser Modi-i, sorkari maneni

sensakertem nem angati ration agütsüba mapatong küm pongu atsülangtsü teletetba agiogo, aser ibaji ajanga linük nung nütsüng crore 80 dak tema tajangzük angutsü, ta metetdaksü. Paisa, Congress party indang nükjidongji nütsüng aika ano maneni kanga sensak tia nung lidaktsütsü atema lir, ta aitsü. Yaküm December ita nung Centre sorkari National Food Security Act ajanga küm ka piyong nütsüng crore 81 nem

jang angati agütsütsü sangdonga liasü. Durg nung election nüboyim lokti senden nung jembidang Ato kilonseri, Chhattisgarh state ya BJP sorkar lenisüba nung tenteta liasü, ta ashi. Paisa, BJP-i takok ngura state nung azükaru alitsü atema inyaktsü, ta nangzük. Assembly menden 200 aliba state Madhya Pradesh nung assembly election November 17 nü agitsü aser December 3 nü vote zünga election agiba osang sangdongtsü.

### Tang atemabo assembly elections tongtimbangba: Mallikarjun Kharge

**New Delhi, Yimpoksüi November 04 (Agencies):** Bihar Chief Minister, Nitish Kumar-i Congress party-i taküm state pongu nung assembly election atema mazüngi inyaker, aser ibaji ajanga INDIA teloktep tashi meiti akümer, ta jembiba sülen Congress Tir, Mallikarjun Kharge-i, opposition INDIA teloktep ya tongtimbang, ajisüaka tang mapang nungbo assembly elections tongtimbangba, ta metetdaksü. Congress Tir, Mallikarjun Kharge-i phone ajanga Nitish Kumar dang, tang atemabo Congress-i state pongu nung assembly elections atema dang rangloker inyaker, ajisüaka state elections tembangba sülen INDIA teloktep nung rangloksü aser longjemer (Lok Sabha) election atema nüboyimtsü ta shiogo, ta osang angazüker.

Bihar Chief Minister Nitish Kumar-i, tesüiba ita ishika tsüngda INDIA teloktep yangerteta liasü, saka Congress party-i assembly elections nung dang rangloker mazüngi inyakba ajanga INDIA teloktep tashi meiti akümer, ta jembiba liasü. Brihostibarnü Communist Party of India (CPI)-i Patna nung ayongzükba lokti senden ka nung jembidang JD(U) tongti lenir, Nitish Kumar-i iba oji jembai liasü. Iba senden nungji CPI general secretary D Raja densema party anaprong nungi lenirtem aika densema liasü. Kumar-i, "Ajisüaka tangbo iba front (INDIA teloktep) kangabo merenloker. Congress-i state pongu nung assembly elections tongtimbangba kümdaktsür ama reprangteter. INDIA teloktep nung Congress nem lenisüba

shilem agütsütsü atema onok ajaki melungtepa liasü, ajisüaka assembly election tembangba sülen ang parnoki (Congress) senden ayongzüktsüa akok," ta jembiba liasü. Kasa sentong nungji Kumar-i, BJP-i Hindu aser Muslim nunger bendangtsü meranger, saka Bihar nungbo yimsü nung ajemdaker telemsa mali, ta ashi. Paisa, Centre nung ruling BJP-i linük puti otsü yanglushitsü meranger, ajisüaka linük nüchiso atema raraba nungbo parnoki shilem agia mali, ta ashi. Kumar-isa, tang Centre nung aliba sorkari osangbenertem tebang nembangtsütsü meranger; Bihar nung pai aniba sorkari inyakba mapa tajungtembo osangkakettem nung junga mesangdonger, ta metetdaksü.

### Piyush Goyal-i IPEF senden nung shilem agitsü

**New Delhi, November 04 (Agencies):** Tan ita Commerce & Industry Union Minister, Piyush Goyal-i San Francisco semdangtsü aser iba mapang nungji pai US aser India tsüngda rongsenkettzüng tsütsü atema jembitsü. Goyal-isa November 13-14 anogotem nung San Francisco nung ayongzükba Indo-Pacific Economic Framework for Prosperity (IPEF) senden nung shilem agitsü. IPEF nung züngsem linük 14 lir. IPEF ya US den Indo-Pacific region nung aliba linüktemi taküm May 23 nü Japan yimtiba, Tokyo nung

tenteta liasü. IPEF züngsem linük 14 ya alima nung GDP shilem 40 aser goods & services shilem 28 lir. Honibarnü Gurugram nung sentong ka nung jembidang Goyal-i, "Tan ita ni San Francisco-i aotsü. Tasen purapiteta inyaktsü atema iba yimti nung US aser India nati longjemer inyakdar. Parnoki India nung sempet aliba lanurtem den inyakner," ta metetdaksü. IPEF nung tanga züngsem linüktemji Australia, Brunei Darussalam, Fiji, India, Indonesia, Japan, South Korea, Malaysia, New Zealand, Philippines, Singapore, Thailand, US aser Vietnam lir.

### Kochi nung helicopter ka tsükokba lendong nung Navy ka asü



November 04, 2023 nikongdang Kerala kübok Kochi nung aliba Naval Air Station anasa Indian Navy indang Chetak helicopter ka tsükoka aliba noksa nung angur. Iba helicopter nung Indian Navy ana liasü aser kabo iba lendong nung süogo.

**Kochi, November 04 (Agencies):** Honibar nikongdang INS Garuda, Kochi nung aliba naval air station nungi Indian Navy indang Chetak helicopter ka apusoba sülen mapang tatsüka tsüngda tsükokba lendong nung navy ka süogo. Indian Navy indang chopper nungji navy ana training agia apusoba mapang tsükok. Iba lendong nung LAM, Yogendra Singh asü. Indian Navy Chief Admiral R Hari Kumar den tongti ketdangsertemi Yogendra Singh nem akhüm agütsü aser par kibong den mangyim jashi lemsatepogo, ta Indian Navy nungi otongdar kati metetdaksü. Indain Navy-i sangdong ka

ajanga, "INS Garuda, Kochi nung maintenance taxi checks mapang Chetak helicopter ka tsükok, aser iba tatalokba nung navy ka süogo. Iba lendong atalokba kuli jangjatsü atema bushisüngdangtsü asoshi Board of Inquiry ka tentetogo," ta metetdaksü. INS Garuda ya INS Venduruthy aser Southern Naval Command indang headquarters anasa lir. INS Garuda ya naval air training centre aser operational base ka lir. INS Garuda ya Indian Navy atema operating station asoshi tesem tajung ka lir. INS Garuda nung training schools, intelligence centres, maintenance aser repair facilities den experimental stations aika amenoka lir.



November 04, 2023 nü Jhalawar district nung BJP lenir aser taoba mapang Rajasthan Chief Minister, Vasundhara Raje-i Jharapatan Assembly menden nungi tokteptsü atema nomination file asüdag tangokba noksa nung angur.

### Raigad nung Pharma Factory mi lendong nung nisung 4 asü aser 7 yiru

**Mumbai, November 04 (Agencies):** Maharashtra kübok Raigad district nung aliba pharmaceutical company indang factory ka nung mi pezü asü aser nisung tenet yiruogo; ano ketdangsertemi samaba nisung tenet bushidar, ta Honibarnü ketdangser kati metetdaksü. Hokolbar anüngdang Raigad anasa Mahad MIDC nung aliba Blue Jet Healthcare nung iba lendong atalok, ta National Disaster Response Force (NDRF)

nungi ketdangser kati metetdaksü. "Tanep kübok Raigad district nung aliba pharmaceutical company indang factory ka nung mi pezü asü aser nisung tenet bushidar, ta Honibarnü ketdangser kati metetdaksü. Factory nung mi lendongji 'short circuit' ajanga atalok asütsüa akok, ta mezünga bushisüngdang ajanga bushitetogo. Factory nungji mi adokba ajanga chemical yua aliba 'barrel' aika apok.



## TIR YIMYIM YIMOBILEM (EDITORIAL)

DIMAPUR AMUNGNÜ, YIMPOKSÜI (YIMPOKSÜI) 05, 2023

### Taküm nung ayi aser sang

**T**süngremi Pai meimba Israel nungertem, parnok nem lezmüksüba temo aketba Canaan lima nung timtem tatidang kecha melii jangratema alitsü asoshi teinyaktsü mapa tejangja ana agütsü. Ibaji ka, Israel nungertemi Canaan lima tashi makyonga aodang, parnok tsükchir kintem den tezüngzüktepba ken o kecha meyanglutsüla aser ano tanga teinyaktsü kaji, parnoki bendanger tsüngrem külemdak tenladak ki ajak raksatsütsüla. Iba o ya kenü anogo Israel nungertem dang Kibuba tenyar kati nenshia metetdaksüba otsü Obendanger tapu 2 tetenzüklen shia angutsü. Aji oda, Tsüngremi Israel nungertem nem inyakdaksünüba mapaji, parnok anemertemji parnok alidak nungi meshimeshia aridoktsüla aser parnok anasa konga bendanger tsüngrem külemdak tenla ki malitsüsa raksatsütsü mapa nungloktsübaji liasü. Atangji, Israel nungertemi matsüngtet tsüngda Canaan aser temeket nung alirtemji tashi tait kintem, parnokji rara nung tesashi aser parnok mitsaji kanga akanga yanglua liasü. Aji oda, kodang Israel nungertemi Tsüngrem tashi nung item tsükchirtemji makyonga ao, parnoki Tsüngremi nungloktsüba ama tsükchirtemji kata anunga meyutsüi makdoktsü melen, parnoki item bendangertem den tangatetep nung külemi alitsü asoshi tezüngzüktepba yanglu aser parnoki bendanger tsüngrem külemdak merakatsüi wazüka yutsü. Ashiko, Israel nungertemi bendangertem taküm aser tenla ki wazüka yutsübaji bendangertemji makoktsü südi ta arendakba ajanga asütsüa akok mesüra bendanger tetsürtemji topur ajungba agi item nemji puadaksü asütsüa akok. Aji oda, Israel nungertemi Tsüngrem taochi aser tashi amadoker temenentsürtem den nüktapangta benshiba aser bendanger tsüngremtem külemdaki aoba tatalokbatem Züngdangba tapu 25 nung kar shia angutsü. Aji oda, Israel nungertemi Tsüngremi ashiba mangai Pa jashidaksü nungji Tsüngremi parnok merenshi aser parnoki wazüka yutsüba bendanger aser bendangtsürtemji teti parnok asoshi ayi aser sang ka ama liasü. Item jagi mapang-mapang shia parnok timtemdaksü aser item purtem denji külemi lisemdang aiben tatidang nung tsüker Tsüngrem jashidaksü. Iba amaji tanüa asenok Khristan taküm nung asenok temulung meyipba mapang, tsübuba agi mesüra apayuba agi meraksai toktsüba temenen jakla aser shisatsü aika asenok mulungjang nung alitsüa akok. Asenoki Tsüngrem meteta lir, saka asenoki item temenentemji kodanga shia marutsüsa raksaa meindokba agi, anogo shia item jagi asenok kangshir aser item tatidang sang nungji asenok tsükpet tsüker. Iba jagi Tsüngremi asenok kanga meimer ser nung aser Paibo asenok kanga moatsüner ser nung, asenoki item temeim aser temoatsütemji magizüktetter. Koba anogo nung asenok Tsüngremi temenen nungi aniteta kümzük, iba mapang nung jagi Tsüngremi asen dak aliba temenentem anema tanüla tongpang ayongzükogogo ta asenoki tanüla nung angatetsüla. Iba anogo nung jagi asenok taküm ya anogo shia tongpang nung rarar sepai amato ka akümer. Aji oda, iba anogo nung jagi asenoki bilemba, benshiba, achi-ajemba aser inyakba temenen mapatem anema asenok kanga sashia nokdaksüla aser item temenen mapatemji sempatsüla aser meshimeshia raksatsütsüla. Asenok taküm nung tongpang tulutibaji iba tanüla tongpangji lir. Iba tongpang akokertem nem takok korang yuja lir ta Tsüngremi ashir. Tanü nü taküm nung item temenentem anema raraba tongpang mekoktetit timtema lira, Tsüngrem dang tanüla temeshi nü dangi yokang ta shiang. Tanüla temeshii asenok yaritsü teti renema dang lir aser tanüla temeshi tashi agi makoktsüba timtem aser tatidang kecha maka.

## OLEMSABANG

### Lemang yanglutetra takar aika adoktsü

~ S. Nuken Longkumer,  
Naga United, Dimapur

Otzü aika jembiyonga nenok tulurtemi kodanga mangashitsü aser aouyatsüba. Centre nungi PM mesüra Ministertemji anir arua parnok tetsüng ajemoka rebrangdaksü nunga majungtsü. Kechiaser nenoki parnok agizüktsüasoshi renemteter aliba jaka aser maparen dang sayutsü. Ministerbai au ta langzütsü aser parnoki yokba rongsen ajak mepong nung samatsü.

Saka Naga lima telung nungbo kecha maka, anungji tiazü mejembi dang ochishia Assam lima nung inyakba ama nenokia inyaka dokang, junga doktsü 50 x 50 saka Nagalimabo yamaji masü 90 x 10 inyaker iba jagi Naga lima narotsüki makumer, lemangtem junga meyangluteter. Tanü Nagalima Sugar Mill sama Cement Factory sama, Paper Mill sama, anungji yamai dang ao nungbo China, Korea, Japan, America lima ama yakta matongtsü. Anungji Rom yimti yangludang küm noklang 300 agia yanglubaji ajateta aotsü amai nükla angur, tulurtem nenok kodaki maotsüakodi, sensakertem nüktzü ayimba Tsüngremi rebranga lir. Asen semchirtem atakatem tiyutsüma aji dang masü Rev. tem, Pastor tem kumdangang ma no, nenok rongnung kar tejang matangba sungdongtem lira joko lepdoktsü mapang tongogo ta mapangi sayur, asenok ajaki meteta aliba otzüttem tanü alima nung tamaren Chuba Hitler, Napoleon, Bin Laden ama parnoki anir alima ajunga nung tulurtem, takartem aika süitema oadokogo, saka Tsüngrem O marakzür, kechiba marakzür tatem maka Tsüngrem O, kümdangang Khristar lendong lir, Chuba yimli melentepa arur saka süitema oadoker, otzü aika zünger mezüngma asenoki züngshigogo, saka mepongama süia oadoker. Tsüngrem O memelenshir, tulurtem Naga lima yanglutsü rongsenbo peria dang aruogo, saka tanü tashi tzüim tarok nung mejanga lir, asen lima yanglutsü rongsen to kong sama? Kechiba asen lima RCC tulutem to renemtet, ochiba RCC yanglutet asü? Noklang shilem nung 80% tai, 20% shidak asütsü. Saka RCC teyanglu ta mangatetsüla, yanglutsüba saka tai ka lirja nü sasa bushiang. Ochi agi yanglu asü masü? Tulur aser takar ya Tsüngremi shimtetba purtem lir, aji jung junga meteta liang, alima nung sensakertem mesütsü asoshi Tsüngremi yamaji ayu, saka asen lima ochi agi anunga lir, Naga lima tiaji rebrangang election mapang nung dang meima sen lemtsü nung majungtsü, shidakba ochir adoktsüla. Asen anasa aliba Assam lima MLA temji asatangang parnokibo 70% mapa shidak inyaker 30% ji dang par kibong aser party tem asoshi amshir, anungji par Assam lima car lemangtem ajungbaji koda jangratemtsü. Aseni Nagalima temerük election agitsü Naga lima jembir' ya tamakoktsü, kechiba tamakoktsü? Naga nungeri rongsen tali meimer, kechiba rongsen tali meimer asen lima lemangtem majungba agi yamai akümer, lemang majung niung rongsen aika arem nung mejanga lir, anungji F/H road yabo tesamadaksü, iba lemang yanglutetra Naga nunger takar aika akümtsü aji ochi aser tejangja lir,. Meyanglutetra kechiba MLA 60 ya shimtet? Lemang yanglu dang Naga nunger shibai timtim agütsür? Naga nungertem ya shir jajatsüba indang jembir? Anungji taruba election atongtsü asoshi küm ishika anunga lir, küm 4 tashi anunga aliba mapang F/H road jagi mapa mekümra tamakok ajurua par telok nem vote tagütsü ta mepishia ayongzükter.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# Skorea nung Khristan 14 tepuokdak ayutsü obendang agütsü



2020 küm August 15 nü South Korea yimtiba, Seoul nung conservative right-wing aser Khristan telok balala nungi züngsemtemi sorkar anema longkak aйдang tangokba noksa nung angur.

**Yimpoksüüi/November 04, 2023:** South Korea nung Tenla ki ka bendoktsüdag sorkar ketdangsertem nokdangba aser yirutsüba atema court kati Arogo ka nung züngsem 14 aija tepuokdak ayutsü obendang agütsüo.

Khristan 14 ji Presbyterian Arogo ka nung züngsemtem lir.

November 1, 2023 nü Seoul Northern District Court nung judge tongti, Lee Jong-kwang-i Sarang Jeil Arogo nung züngsem 14 ji ita trok nungi küm 3 tashi tepuokdak ayutsü obendang agütsü.

Tesüiba küm 36 tsüingda tang mezüing iba ama tatalokba ya ajurur, ta shia Lee-i, aibeleneritem jagi linük temzüing anema nokdaker, ta aitsü.

"1987 küm linük temzüing yanglushiba sülen tang mezüing

iba ama ya ataloker, kechiyong court telemtetba ka anema parnoki inyakogo. Iba ya court telemtetba aser ozüing alema odiodia inyakba lir," ta Lee-i metetdaksü.

Iba ken o nung aibelener Khristan 14 ji tepuokdak ayutsü aser loktiliba tenzükba mapa balala inyakdaksütsü.

Right wing pastor aser Darang Jeil Arogo nung züngsem, Jeon Kwang-hoon-a küm asem tepuokdak ayutsü obendang agütsüo.

Pastor Jeon ya Christian Council of Korea nung Tir inyaka liasü saka pai tashishitsü otem jembiba ajanga 2022 küm pa National alliance nungi agiena liasü.

Kasa Arogo nungi züngsem asem küm ana tepuokdak ayutsü, züngsem pongu küm ka

ser tesadang tepuokdak ayutsü, züngsem pongu ita 8 tepuokdak ayutsü aser kabo ita 8 tepuokdak ayuba den ghonda 160 lokti tenzükba mapa inyakdaksütsü.

2020 küm November ita nung judicial aser police-i Tenla ki bendoktsüba mapang nung Arogo züngsemtemi ibaji nokdangba ajanga rara adoka liasü.

Court nung tenük kuli alirtemi ashiba agi, Khristantem jagi bottle aser lung agi sorkar ketdangsertem dakji aonba den külemi merang 'pipe' agi ketdangsertem dak azük.

2020 küm May ita nung ken o ka nung Jangwi District 10 Redevelopment Association-i Sarang Jeil Arogo madak takok anguba sülen court-i iba Tenla kiji bendoktsü tuyua liasü.

# Alima nung reshikangshi ajangshiba Khristan million 200-300 lir: ICC

**November 04, 2023:** Alima tesem balala nung reshikangshi ajangshiba Khristan million 200 nungi 300 shi lir aser Khristantem tamajungtiba reshikangshiba linük 10 rongnung Nigeria, North Korea aser India densema lir, ta International Christian Concern (ICC)-i report ka ajanga metetdaksü.

Tanüingba linüktemji Iran, China, Pakistan, Eritrea, Algeria, Indonesia aser Azerbaijan lir.

Nigeria nung taküm March 4 nungi tenzüka July 6 tashi nung Khristan 549 tepsetogo, ta ICC-i metetdaksü. Item tatalokba rongnung April ita nung Nigeria nung Kaduna State kübok yimtsüing ka kija nung Khristan 33 tepsetba densema lir.

North Korea nung Khristan 400,000 shi lir, ajisüaka linük nung Khristantem tepuokdak ayur, reshikangshir mesüra tepseter, ibayongji Khristantemi meimshia dang külemer.

"Kim Jong Un yimsüsüba

kübok North Korea nung Khristantem aser yimtenren tsütsü melung mesüi ola adokertem anema inyaker. Khristan yimsü benshibaji Supreme Leader anema inyakba ama züngshir," ta ICC-i metetdaksü.

"Anungji Khristan ka asütsüji yimtenren tsütsü ozüing alema inyakba ama züngshia tepuokdak ayur, reshikangshir aser tepseter," ta ICC-isa metetdaksü.

India nung yimsü alia amangba nationalism ya Khristantem atema amokmeren ka lir, ibayongji Khristantem anema inyakba tatalokbatem kanga bulua akümer aser Ato kilonser Modi-i aibeleneritem anema meinyakba ajanga tensa tamajungba dang akümer," ta ICC-i metetdaksü.

"India nung Khristan million 26 lir aser 2023 küm nungbo Khristan minority anema inyakba kanga bulua kümogo. Yaküm-a India nung

Khristantem anema inyakba tatalokba 600 dak tema liasü," ta ICC-i metetdaksü.

"2022 küm tatembanglen Chhattisgarh nung aser 2023 küm Manipur nung Khristantem jenti tepsetba ajanga tarutsü nung India nung Khristantem atema temaitsü tamajungba sayur," ta ICC-i metetdaksü.

ICC Tir, Jeff King-i, "Tia maka alima tesem ajaklen reshikangshi ajangshiba Khristan million 200 nungi million 300 shi lir. Tesüiba küm 20 dak tema ni item nütsüing tenzüka arudar. Parnok atema ola adoktsür maliba ajanga ni süngmanger," ta metetdaksü.

"Yisu sülen anidakba agi alima tesem balala nung asen adianu aser aianutem tepseter, tepuokdak ayur mesüra reshikangshir. Küm 20 tashi International Christian Concern (ICC) nung inyaka arudang alima tesem balala nung Khristantemi pei tamang atema tasü aitba ngua ni ajungmesor," ta pai metetdaksü.

# ANOGO ABEN TSÜNGREM DEN

## KHRISTAN KA AMA TIMATEMBA

"Khrista tenüing atema nenok atalara, nenok tepelatsü, kechiaser sentsüwangshi aser Tsüngrem tanela nenok madak lir" I Pet.4:13

Timtem ta asenoki kodang angashidir aser jembidir asenoki iba ya aiben mashilen nungi dang angateter. Saka kodang asenoki timtemba indang anüdoklenji reprangdangdir timtemji Khristan ka asoshibo maongka lir. Yisu taküm nung timtem ajangshibaji koda tesüngmangtsü aser maongka tulu lir. Shitakba aser ochi nung timatembaji Khristan ka asoshi kangki lir aser ya mebentet nungbo ni Khristan ka ta ashitsü metemsü aser makok.

Annei Johnson Flint, tamangtir tetsür aser nüngtugu tezülur ka. La ya 1866 nung aso, tanur asüdag tsürabur anaprongla süatok. La aiür küma aodang, tashitak aikati menep - arthritis, cancer, blindness aser temang sünga komo adoker asü. Saka item tensa ajuruaka lai Tsüngrem tenüing asang. Aser iba nüngtem nung lai sangro ka züluba tanü kanga nüngtugu süa aikati züngteper "He Giveth more Grace" Iba sangro nung yamai shia lir, Kodang asenok khu reta akümer, Pai taochi aser tesünep tali agütsür, aser kodang asenok tashi atemer aser timtem ajanga lula-a akümer, idangji pai pa temeim taochi tali-tali agütsür.

Tanü Khristan ka ama asenoki timtemji koma agizüker?

### SARASADEM:

**Tsüngrem na atema timtemtsü koda jangratemtsü, nai yariangma. Amen**

# Evangelical Alliance 16-i Gaza nung rara anentsü akhanger aser Hamas aitsür

**November 04, 2023:** (WEA) regional Israel aser Hamas na tsüingda rara ajanga Gaza Strip nung civilian aika asüba mapang Evangelical alliances aser fellowships 16-i Gaza nung timtemba nüburtem nem teyari agütsütsü atema tangsa rara anentsüla, ta takhangba agütsü.

Alliance-i 16-i külem sangdong ka ajanga, "Onoki Arogotem aser tamangertem dang region nung yimjung atema maneni inyaksü ayongzüker, koba ajanga region nung ochi temeden ajungkettsütsü aser aria bilemba den ajemalu sayutsü," ta metetdaksü.

"Rara anenba den külemi anema apusortem aser takoksa angurtem melungjang nungi mayangtsü tebilemba indokba ajanga dang yimjung alitsü," ta parnoki metetdaksü.

Iba sangdong nung sign asürtem rongnung Middle East, Asia aser Latin America nung aliba World Evangelical Alliance

association densema lir; iba denji külemi Algeria, Egypt, Ethiopia, India, Iraq, Jordan, Kenya, Kurdistan, Nepal, Qatar, South Africa aser Sri Lanka nungi WEA züngsemtem densema lir. Taküm jenti samaba, yimjung atema peria meinyakba aser alima linüktemi international humanitarian ozüing akhüm metsübuba ya tesasatsüka lir, ta sangdong nung shia lir. India aser Latin America nung aliba WEA affiliates-ibo rara dak sendakba nung Khristantemi jembiba otem nung metokmeperi lir, ta metetdaksü.

Evangelical Alliances 16-isa 'anti-semitism' (Yihuda nung sempapa) tapu ajak aitsüba den külemi Hamas telok aitsü aser Hamas dang parnoki pua alir ajak chioktsü takhangba agütsü.

Parnokisa, "Israel-i Hamas anema inyakdang civilian ang teimba asür," ta metetdaksü.

AO OSHI ANGAZÜKDAK: TANÜ ANGAZÜKTSÜBA OJANG



Sayubentsü

(adj) tajung akümtsü ashiba (advise)

\* Tanur shingaia tsürabur sayubentsü o meindoktsüla.

Sayumachi

(adv) sayubentsü o manga (disobey)

\* Sayumachi chirnurtemi tsürabur maksütsür.

OLONG PAITEP # 6686

15x15 crossword grid with numbers 1-17 indicating starting positions for words.

TIPLÉN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S\_ \_ \_ i - (3)
9. Nisung rongnung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatemangtiba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Kenyongi majinü - (5)
13. Rong kanga tulu - (5)

OLONG PAITEP # 6685 TELANGZÜBA

TIPLÉN :

- 1. Awatsüng, 5. Aika, 6. Alulem,
8. Otsü, 9. Galil, 12. Atala, 14. Jila,
16. Pungzü, 17. Rone,
18. Rongrong.

LANGTSÜNGLEN :

- 1. Asang, 2. Ajunga, 3. Gado,
4. Mazük, 7. Meimtep, 10. Bangso,
11. Ajuru, 13. Azüng, 15. Aser.

NAI-A YA METETTER MA

1975 KÜM NUNGI ODI CRICKET WORLD CUP TAKOKER YAMAI :

Table with 4 columns: Year, Host, Winner, Runner-up. Lists cricket world cup winners from 1975 to 2023.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

Meghalaya nung India & Malaysia joint military exercise agi



Shillong, November 4, 2023

(Agencies): Linük ana tsüingda tesentaktep akangshitsü atema Indian Army aser Malaysian Army nati 'Exercise Harimau Shakti 2023' ta ser joint guerilla warfare military exercise agiogo.

Iba exercise ya Meghalaya kübok Umroi cantonment nung

agi aser linük ana nungi army temi sub-conventional warfare environments angazük.

Iba training ya October 23 nungi tenzük aser Multi-Domain Operations (MDO) aser drones, unmanned aerial vehicles aser helicopters amshia tactical drills agia liasü.

Iba exercise nung Malaysia

nungi Fifth Royal Battalion aser Rajput Regiment nungi Indian personnel-i shilem agi.

'Exercise Harimau Shakti 2023' ya Deobarnü tembangtsü aser iba atema sentong tajung ka renema lir. Iba mapa ajanga India aser Malaysia armed forces tsüingda tesentaktep akangshitsü.

Arunachal nung NPP züngsem aika BJP nung aden

Itanagar, November 4, 2023

(Agencies): Arunachal Pradesh kübok Papum Pare district nung NPP züngsem aika BJP nung denogo.

2024 nung Arunachal assembly aser parliamentary elections agitsü ita trok jakdang party ka toktsür ka nung adenba tenzükogo aser tanü Doimukh jila nung NPP züngsemtemi BJP nung aden.

Doimukh panchayat nung lokti adenba sentong ka ayonga agidang National People's Party (NPP) lennirtemi anir züngsemtem BJP nung aden.

Iba sentong nung MLA Doimukh Tana Hali Tara, BJP President Papum Pare Ngurang Logi aser NPP lennir Nabam

Takar nunger aden. Doimukh BJP MLA Tara-i o jembidang pa lenisüba kübok tesüiba küm pezü ser tesadang nung BJP party ajanga mapa inyakbatem metetdaksü.

"Iba sentong nung Tech Rakap zilla, Dogum Rabi, president Doimukh Bazaar Welfare Committee, senior citizens Nabam Tagum, Nabam Takar aser Nabam Epo nunger adenba atema tenüngsang agütsür" ta Tara-i ashi.

"Kü kümsük nung infrastructures aika amenokogo. Gari lenmangtem tajungba kümogo, Amba aser Amchi anasa gym club lapok, Doimukh town nung division offices tasentem yanglu aser

police station ka lapokogo" ta paisa ashi.

"Tesüiba Congress sorkari DMO office lapokba sülen senotsü maliba agi tia kanga mejungi liasü saka ni sorkar senpong nungi senotsü meshia kasa office yanglushiogo" ta MLA Tara-isa ashi.

"PM Modi lenisüba kübok Arunachal ajunga aser talisa Papum Pare district nung terenlok jenti nguogo. MLA ka aser party nung tejenpur ka ama nübortemi tamang akar aser BJP party-i terenlok atema inyaker ta amanger" ta MLA Hali-ia ashi.

Hali-isa Doimukh jila nung shishilembartem dang BJP dak temulung alemtsü ayongzük.

Moreh nung Myanmar nunger 2 dena Kuli telungpurtem apu



Imphal, November 4, 2023

(Agencies): Tesüiba ghonda 24 tsüingda Tengnoupal district kübok Moreh Sub Division nung tesem balala mita aodang Myanmar nunger ana dena Kuli telungpur 7 puogo.

Iba mapang prangpong-injang kar den camouflage jackets aser boots ngutet aser joint security forces-i apurtemji arishi küm 20 nungi 56 tsüingda alirtem lir.

Parnok ya United Kuki Liberation Front züngsemtem ta osang angazüker.

October 31 nü Kuki telungpur kati SDPO Moreh, Chingtham Anand Kumar khasetba sülen Kuki telungpurtem anema mapa inyaka arur.

Imphal nungi Moreh-i sepai talila lemsütsüogogo aser parnoki tanü agi anogo pezübuba operations agia arur.

Manipur nung joint security forces-i Toulal, Laikhot, Senjang, Moreh Muslim Basti, Nepali Basti aser Toulal yimtsngtem mita ogo.

Tesüiba ghonda 23 4 tsüingda apurtem rongnung Netingam Lupho (55 yrs), Jamkohao Lupho (46 yrs), George Holkhoset Khongsai (20 yrs), Letgoylen Dounel (25 yrs), Jangkhohao Haokip (34 yrs) Myanmar aser Ma Mong Su (26 yrs) Myanmar nunger dena lir.

CoTU-i CM Biren Singh aitsür:

Külen, Committee on Tribal Unity (CoTU) Sadar Hills Kangpokpi-i Manipur Chief Minister N. Biren Singh dak tai tongloktsüogogo.

Manipur nung ita trok tashi mepetmesüa aruba ya CM Biren Singh-i tasa atonga inyakba lir ta CoTU-i ashir.

Kuki-Zo nungeri Meitei nunger ket nung asürtem bilemteta sentong ka agiogo.

Kangpokpi district nung Sixth Remembrance Day ya CoTU-i acha-ayanga Kangpokpi Town, Keithelmanbi, Saparmeina, Motbung, Kotlen, Leimakhong aser Saikul nung agi.

"Manipur Chief Minister N.

Biren Singh-i Manipur nung mepetmesü adoktsü tasa atonga inyak" ta CoTU Chairman Thanglen Kipgen-i ashi. Pa ya Zo-United nunga Finance Secretary lir.

Manipur putiotsü meyipa reprangdangra Chief Minister aika inyakogogo aser kin temeyoktep balala yimjung nung dang lia aru, ta pai ashi.

"Ajisüaka, kodang N. Biren Singh-i Chief Minister aküm pai kin o kin tsüingda tesempatep adokdaksü aser tatem nung Mini-India state ya tesemapatep, azütokshi aser tashiyim inyakba state ka kümdaksü" ta Kipgen-isa metetdaksü.

"Tanü Mini-India Manipur ya lemdangogogo aser Chief Minister N. Biren Singh-i aniba sorkari May 3 nü lendong adokdaksüba sülen kin ana tsüingda lemsaogo" ta paisa ashi.

Kuki-Zo nungeri state sorkar dak tamang makar anungji Centre sorkari dang mepetmesü anentsütsü akok, ta Kipgen-isa ashi.

## MOLUNGNEN O



Late Akang Ao  
1937 - 2023

Asür Akang Ao mapang tatsüka shiranga aliba mapang aser October 26, 2023 nü iba lima nungi pila aoba anogo tashi shirnokisa ozü kibong dang temeim sayua onok nongitogo nenok ajak dang kanga pelar. Nenoki lenla balala nung teyari agütsüba aser sarasadem agi nongitba den tsüngtong arua shilem agiba ajanga mangyim jashi khuret koktettsü asoshi onok nem tesunep aser tashi agütsüogo.

Onok tebu ya tashitait aser ochishir liasü. Pai onok toktsür aoba ajanga onok taküm nung tawa ka adokdaksüogo.

Anungji tarutsü nunga nenok sarasadem aser nübo agi onoki maneni nongita yariangma.

Onoki nenok nem meyipa agütsütsü kecha mali ajisüaka tajungsang Tsüngremi nenok ajak moajang ta sarasademtsür.

~ Temeim Kinungtsü, Chirnur, Anükapang aser Semchirtem.

## TSÜNGREM TUSHIA SANGDONGER

**Wb. T. Rongsentemjen Imsong** Ungma, S/o Mr. & Mrs. Taliwati Imsong Ungma Imlang, FCI Department (North East Zone) nung inyaka lia ano pai temaba jenjang asoshi tatidang nung takok nguteta FCI APS LOPE (Limited) Department Manager (General North East Zone) menden ajangzüktetbaji pei sasa agi masü, saka Tsüngremer temoatsü ta tenüng sanga Imsongunger Asemjungba Semchirtemi pelaba sangdonger. Tarutsü nunga ochishia nübur tenzüksü maneni ajungshir aser Teyanglur Tsüngremi ne taküm moajangma ta asen semchirtemi sarasademtsür.

**Sd/-**

1. Imlı Imsong, Tatar
2. Merenjenba Imsong, Tatar
3. Tsuknungsusang Imsong, Tatar
4. Akanglemba Imsong, Tatar
5. Sakulepden Imsong, Tatar
6. S. Ali Imsong, Tatar

**Bharat Petroleum Corporation Limited**  
(A Govt. of India Enterprise)

**NOTICE FOR DRAW**

Bharat Petroleum Corporation Limited hereby informs that the draw for Durgam Kshetriya Vitrak LPG Distributor for location Doyapur, District Dimapur, Nagaland will be held on 09.11.2023 at the Conference Hall of Deputy Commissioner's Office, Chumoukedima, Nagaland at 11:00 am.

Applicants who have qualified for the draw are requested to be present in person with photo identity card issued by any Government Department at the specified date, venue and time.

**Energising Lives; Energising Naya Bharat**

## Nepal nung menoknok tesashi ka anak: nisung 143 asü



Nepal kübok Jajrakot tesem koba Hokolbar aonung menoknok anakba teyongtsü liasü, iba tesem ajaras aliba noksa nung angur.

**Kathmandu, Yimpoksüi/ November 4 (Agencies):** 6.4 magnitude tesashi menoknok kati Hokolbar aonung ayaterem nung Nepal anakshija liasü. Iba lendong nung nisung 143 asü aser nisung 100 dak tema yiruogo.

Iba menoknok ya Rajasthan, Uttar Pradesh, Bihar aser Delhi-NCR region nunga ajangshia liasü. Menoknok ya aonung 11:47 nung anak aser epicenter ya Kathmandu nungi km 142 aser New Delhi nungi km 941 pila Jajrakot kübok Lamidanda tesem nung liasü.

Menoknok lendong nung asürtem timba akümtsü akok kechiyong tekümzüka maparen tang tinyakdak lir. Ato Kilonser Pushpakamal Dahal 'Prachanda', Honibar anepdang medical team ka den lendong atalokba tesemiogo.

Tekümzüka maparen balala inyaksü atema Nepal Army aser Nepal police naprongla yokogo, ta ketdangsurtemi metetdaksü. Menoknok anakba sülen

Nepal kübok tesem aika nung communications makai aküm.

Social media nung noksa aser video balala lemsatepba ajanga Nepal nung menoknok koda sashia anak iba indang jangjaogo aser ki chireper alidak nisung aika sabanga lir. Jajrakot aser West Rukum districts nungi asürtem timba liasü aser tanga district tem nungia nisung asüba indang osang agütsüdar, ta ketdangsurtemisa metetdaksü.

Nepal ya India aser Eurasian tectonic plates nung amenoka lir aser iba ajanga mapangshia menoknok agi kongshir. 2015 küm 7.8 magnitude menoknok ka aser aftershock tem agi nisung 9000 shi tepseta liasü. Hokolbar aonung menoknok anakba densema Nepal nung ita ka tsüngda menoknok asemben anakogo. October 2 nü 6.2 aser 4.6 magnitude ta menoknok ana agi Nepal kongshia liasü. October 22 nü ano 6.1 magnitude menoknok ka agi Nepal kongshi aser iba menoknok indang epicenter ya

Kathmandu nungi km 55 pilar Dhading tesem nung liasü.

National Earthquake Monitoring Centre-i ashiba agi, Hokolbar aonung ano 12.08am nung 4.5 magnitude tremor ka agi Nepal kongshi aser iba sülen 12.29 nung 4.2, 12.35 nung 4.3 aser 4.16 am nung 4.6 magnitude tremor tem agi kongshia liasü.

Aftershock aika aruba ajanga nüburtem tsübutepa parnok aonung tepeyong kima dang mapang intoka liasü.

"Ato Kilonser Pushpa Kamal Dahal-i, Hokolbar aonung menoknok lendong nung asürtem aser ali rongsen samaba atema kanga sasa bilemba lemsatepogo aser tekümzüka maparen balala atema security lokti tentet asemprongla anidenogo," ta PM office sangdong ka ajanga X sabang nung metetdaksü.

India Ato Kilonser Modi-ia, tang amala timtem lendong mapang India nung ajak Nepal nung den nokdaka lir aser takokba tashi teyari agütsütsü mulunga lir ta shiogo.

## Pakistan nung airbase ka ama; amaker 9 tepset

**Islamabad, Yimpoksüi/ November 4 (Agencies):** Telungpur telok kati central Pakistan kübok Mianwali nung air force training base ka amak, ajisüaka iba tesem amakertem teku tepsetogo, ta Pakista military sangdong ka ajanga metetdaksü.

"Sepaitemi kanga kara telangzüba agütsüba ajanga iba tesem amakba nokdangtetogo aser base nung aliba sepaitem aser kiojen aser osettem kümzüktetogo," ta military-i sangdong kanga ajanga metetdaksüba den airbase amakba mapang tayimtsü asem aser fuel tanker ka raksaogo, ta shisem.

Tawa tentetba telungpur telok; Tehreek-e-Jihad Pakistan (TJP), shirnoki linük kübok tesem balala maka arudar, parnoki iba tesem amakba nangzüko. Iba telok nungi otongdari osangbenertem nem iba osang agütsüba liasü.

Linük caretaker Ato Kilonser Anwaar ul-Haq Kakar-i, telangzüba tajung agütsüba atema Pakistan air force nem tenüngsang agütsüogo.

"Onok security raksatsütsü merangertem nem telangzüba tapet agütsütsü," ta pai X sabang ajanga ashi.

Southwest Baluchistan province nung military convoy ka maka sepai 14 tashi tepsetba sülen anogo ka lir iba base maka liasü. Hokolbar nusa police mena aliba gari ka bomb aser injang agi amakba sülen nisung asem asü aser nisung 20 dak tema yiruua liasü.

Pakistan nung taküm azütokshi lendong aika ataloka arudar aser item lendongtem ya TJP aser Tehreek-e-Taliban Pakistan (TTP) amala telungpurtem inyakyim dak sendaka lir.

Kasa mapang nung linük tang yimden yimsüsüba aser rongsenketzüng tsütsü mepetmesü adoker aliba mapang ka lir aser iba ajanga temzüng ozüng daka kongshir.

August ita linük kübok tesem 99 tashi amakba ajangshio, koba 2014 küm November ita sülen ita ka nung tesem timtiba amakba liasü, ta Pakistan Institute for Conflict and Security Studies-i ashi.

Pakistan kübok Afghanistan den arrtsü nung tribal tem aliba tesem ya küm aika telungpurtem jenokdak lir. Ajisüaka 2014 küm Army-i achayangba school ka maka nisung 150 dak tema tepsetba sülen Pakistan army-i Afghanistan den arrtsü nung telungpur teloktem samatsütsü asoshi meita ao tenzüka liasü.

Tribal tem aliba tesem ya küm ishika tsüngda district balala küma lemsatsüogo aser Pakistan Army-i ashiba agi, parnoki local aser bendanger telungpurtem item tesemtem nungi mintokogo, ajisüaka item teloktem yagi mapang mapangshia tesem balala maka arudar.

Kasa mapang nung Pakistan nung mepetmesü tali küma aoba mapang ka nung taruba küm February ita 8 nü national election agitsü lemtego.

# 5buba 'Throttle Thrust' asayamung takok ngua asayaogo



Winners den tongti tesemdang MLA C. Manpon Konyak nungertem noksa nung angur

**Dimapur, Yimpoksiü/ November 4 (TYO):** Nov 3 aser 4 anogo ananü Spearhead Motor Initiative-i ayongzükba Ungma yim lushi (Mokokchung) nung gari asemtepba 5 buba 'Throttle Thrust' sentong takok ngua kaogo.

Senpet agütsüba sentong nung MLA C. Manpon Konyak tongti tesemdang liasü.

Iba asemtepba ya supersprint aser hill climb yimya nung agia liasü. Taküim asemtepba telensa asem - Below 1300 CC, SUV

aser Open Category nung liasü. Telesa balala nung takokertem yangi agütsür;

**1st :** KIMA JAMIR, from SPEARHEAD

**2nd :** TOMITO V SHOHE, from STREET KINGS

**3rd :** KEVIN PURO, from NAC

**BELOW 1300 CATEGORY**

**1st:** TOMITO V SHOHE, from STREET KINGS

**2nd:** ALEM I JAMIR, from AMAM

**3rd:** THEZIEU KIRE, from KAMC

**SUV CATEGORY**

**1st :** LANUSUNEP from SPEARHEAD

**2nd :** RUOKUOBIETUO KENSE from NAC

**3rd :** ANA SOLO, from KMAC

**NIJA SENPET:**

Tomito V Shohe Best Timer Stage I (Day 1)

Tomito V Shohe Best Timer Stage II (Day 2)

# FIFA World Cup qualifiers atema asayartem sangdongogo

**Yimpoksiü/November 4, 2023 (Agencies):** India tebur team head coach Igor Stimac-i, Hokolbarnü FIFA World Cup 2026 atema Round 2 nung mezüngbuba asaya ana aser AFC Asian Cup Saudi Arabia 2027 Preliminary Joint Qualification asoshi asayar 28 sangdongogo.

India football team Group A nung mezüngbuba asaya Brehostibarnü (November 16) Kuwait City kübok Jaber Al-Ahmad International Stadium nung 22:00 IST nungi tenzükä Kuwait den asayatsü aser iba

sülen kidangi meyipa arur Mongolbarnü (November 21) 19:00 IST nungi tenzükä Kalinga Stadium, Bhubaneswar nung Qatar den asayatsü.

Maneni India team November 8 nü qualifiers atema renemshitsü asoshi Dubai, United Arab Emirates-i aotsü.

Kuwait aser Qatar den asayatsü atema asayar 28 shimdanga alirtem yamai alitsü:

Goalkeepers: Amrinder Singh, Gurpreet Singh Sandhu, Vishal Kaith.

Defenders: Akash Mishra,

Lalchungnunga, Mehtab Singh, Nikhil Poojary, Rahul Bheke, Roshan Singh Naorem, Sandesh Jhingan, Subhasish Bose.

Midfielders: Anirudh Thapa, Brandon Fernandes, Glan Peter Martins, Lalengmawia, Liston Colaco, Mahesh Singh Naorem, Nandhakumar Sekar, Rohit Kumar, Sahal Abdul Samad, Suresh Singh Wangjam, Udanta Singh Kumam.

Forwards: Ishan Pandita, Lallianzuala Chhangte, Manvir Singh, Rahul Kannoly Praveen, Sunil Chhetri, Vikram Partap Singh.

# Phek nung open road bicycle rally asayaogo



**Dimapur, Yimpoksiü/ November 4 (TYO):** Phek district kümteter küm 50 ajungba nüngdem nung open road bicycle rally ka November 4 nü Pfutsero kübok Glory peak nungi MLA Neisatuo Mero-i tenzükja liasü. Iba rally ya 'Rally of Phek' omen nung ajemdaker asaya liasü.

Sentong nung o jembiba mapang Dr. Neisatuo-i, cyclist tem Pfutsero nungi Phek tashi km 50 aotsü, koba Phek district kümteter küm 50 ajungba temaitsü lir aser iba ya district

nung aliba nüburtem atema tajung asütsü ta amanger, ta ashi.

Paisa, state aser linük kübok tesem balala nungi lanurtem aika adenshia iba rally nung shilem agiba ngua kanga pelar aser national medalist temia shilem agiba ajanga rally nung shilem agirtem ajungmesotsü ta ashi.

Pai ashiba agi, cycling ya Phek temeket aser Nagaland nung saisapong balala ayongzükä asayaba mapang asaya ka asütsü nüngdaker ta ashi. Cycling ya noklang nung noklang eco-friendly aser iba

ajanga mopung memenentsür ta shia pai rally nung shilem agirtem dang iba amala asaya ya state nung ajungketsü ajungshi, kong CM Neiphiu Rio-i saisapong ajungketsü atema kanga rangloker inyakdar, ta paisa shisem.

Dr. Neisatuo-i ashiba agi, tourism industry ajungketsü atema Pfutsero ya tesem tajungtiba rongnung ka lir ta shia tourism department dang iba tesem nung project balala benoka inyaksü ayongzükä liasü.

# Pandya Cricket World Cup nung masayatetsü

**Dimapur, Yimpoksiü/ November 4 (Agencies):** India team vice-captain Hardik Pandya, tetsüng teloktep yiruba sülen tang asaya aliba Cricket World Cup nung tanungba asayatem nung masayatetsüsa kümogo.

Arishi küm 30 tain Pandya ya October 19 nü Bangladesh akokba asaya nung pai aonba ball ka batsmen-i azükba nokdangtsü meranga mapang yirua liasü

Pa iba World Cup nung India team taoba asaya asem tashi nung masayatet aser tang pa melena fast bowler Prasad Krishna team nung züngoksemogo.

"World Cup nung tanungba asayatem nung masayatetsüsa akümiba ya agizüktsü tasak," ta Pandya-i X sabang nung post sütsü.

"Kü tanülabo team den alitsü aser asaya shia ball aonba shia team pusemstsü.

"Nenoki ni nongitba aser temeim sayuba atema kanga pelar.

"Iba team ya tangar dang nungi balaka aser team-i ajak nemadangdaksütsü ta



Hardik Pandya

amanger," ta paisa shisem.

Hardik-i team liromedema küm daksüba ya India team-i iba asayamung akoktsü asoshi kanga tongtibang asütsü ta bilema liasü, shibai iba asayamung nung wicket pongu agiogo.

Ajüsüaka pa medeni England, New Zealand aser Sri Lanka akokba ajanga tetsüba aliba aika süngjemdaksüogio.

Pandya temelener ama Mohammed Shami-i team nung kanga tongtibang shilem agia arudar aser pai tang tashi nung asaya asem nung wicket 14 agir lir.

Kasa mapang nung Krishna-i tang tashi nung India team nungi ODI asaya 17 aser T20I ana nung asaya lir aser iba mapang pai wicket 33 agir lir.



Systematic voters Education and Electoral Participating (SVEEP) kübok Nagaland Sports Association den longjemer Deputy Commissioner aser District election Office, Zunheboto Rahul Bhanudas Mali, IAS-i ayongzükä Zunheboto college nung November 3 aser 4 nü football camp aser exhibition asayatem ayongzükä asayaogo. Iba sentong ya voter tasentem nem vote asütsüba aser parnok tenüng züngoksemba dak sendakba nung tangazükba agütsütsü nüngjidong nung ayongzükä agiogo.

# Tuensang nung Nagaland Olympic & Paralympic Game atema trail agitsü

**Dimapur, Yimpoksiü/ November 4 (TYO):** 2024 küm January 8 nungi 13 tashi asayatsü aliba Nagaland Olympic and Paralympic Game 2024 (NOPG) dak sendakba nung Tuensang Deputy Commissioner Lithrongla Tongpi Rutsa-i sagdong ka ajanga, Athletics atema Tuensang District nungi asayartem shimtsü asoshi December 12 aser 13 nü Tuensang HQ nung trail agitsü ta metetdaksüogio.

Trail ya item asayatem atema agitsü:

100 M Race, 200 M Race, 400 M Race, 800 M Race, 1500

M Race, 5000 M Race, 10,000 M Race, 4x100 M Race, 4x400 M Race, 4x400 Mixed Race, Long jump, High jump, Triple jump, Shot put, Discus Throw aser Javelin throw.

Trail nung asayar kati timba agi asaya asem tashi nung shilem agitettsü. Trail nung shilem agitsü atema tenüng züngoksemstsü asoshi dctuensang@gmail.com dangi email sütettsü mesüra iba number: 9862569975 ajanga whatsapp sütettsü. Osang tejangjaba agitsü asoshi item number; 8837348809/ 9862569875 nung tongteprateptsü atema DC-isa metetdaksüogio.

**BILEMDANGANG**  
"Tamang makatetra timla samatsü."